

**Pemandu bidas Wan Azizah tentang dana GTP**  
**Malaysian Insider**  
**12 Julai, 2012**  
**Oleh Amin Iskandar**

KUALA LUMPUR, 12 Julai — Unit Pengurusan Prestasi dan Pelaksanaan (Pemandu) hari ini membidas kenyataan presiden PKR, Datuk Seri Wan Azizah, baru-baru ini yang mendakwa 71 peratus daripada peruntukan Program Transformasi Kerajaan (GTP) dibelanjakan untuk aktiviti perhubungan awam.

Hanya 0.75 peratus dana GTP dibelanjakan untuk aktiviti tersebut, katanya.

Pemandu menjawab tuduhan Wan Azizah dengan menyatakan dakwaan tersebut adalah tidak benar dan tidak tepat.

"Hanya 0.75 peratus dana GTP untuk mengurangkan jenayah dalam NKRA, digunakan untuk memberikan kesedaran kepada orang ramai melalui media untuk memberitahu rakyat tentang perkembangan terkini inisiatif kerajaan yang telah dikenalpasti untuk memerangi jenayah sekaligus menjadikan Malaysia lebih selamat," kata Eugene Teh Yee, Pengarah 'Pencegahan Jenayah' NKRA Pemandu dalam program bersama media pagi ini.

Dalam sidang akhbar baru-baru ini, presiden PKR mendakwa kerajaan membelanjakan 71 peratus peruntukan GTP untuk aktiviti perhubungan awam dan bukan memerangi jenayah.

Menurut Teh lagi, kenyataan bekas ahli parlimen Permatang Pauh itu adalah langsung tidak benar dan tidak tepat mengenai cara dana dibelanjakan di bawah program GTP.

"Kami percaya Wan Azizah tersilap dan menyangka kos untuk menghantar anggota polis ke lapangan sebagai kos perhubungan awam" kata Teh.

"Ini adalah tidak benar kerana dana tersebut digunakan sebagai perbelanjaan untuk menghantar anggota polis ke lapangan."

Menurut Teh, Wan Azizah seharusnya bertemu Pemandu untuk mendapatkan penjelasan sebelum membuat kenyataan palsu kepada media dengan niat untuk menggelirukan orang ramai tentang kerja sebenar dan pencapaian NKRA.

"Tugas 'Pencegahan Jenayah' NKRA, Pemandu, adalah untuk mengenalpasti dan memperbaiki keadaan keselamatan awam dengan bekerjasama dengan beberapa agensi lain yang terlibat langsung dalam program pencegahan jenayah," katanya.

"Memperbaiki persepsi rakyat bukanlah tugas kami.

"Tugas Pemandu adalah berinteraksi dengan rakyat secara berterusan untuk mendapatkan maklumbalas daripada mereka."

Hakcipta © 2012 The Malaysian Insider

Source:

<http://www.themalaysianinsider.com/bahasa/article/pemandu-bidas-wan-azizah-tentang-dana-gtp/>

